



Gianni Gregoricchio

Sul sît de Arlef il teatri di Gregoricchio

Ancje se a 'nd è passâts passe vot de muart di **Gianni Gregoricchio**, mancjât tal 2007 a 80 agns, la sô opare e je simpri atuâl.

E ca di cualchi timp, massime chê teatrâl, e sarà ancjemò plui a disposizion dai passionâts dal gjenar, in particolâr di chei che a doprin Internet par procurâsi materiâi. Come che e ricuarde ancje la fie Francesca sul so profil Facebook, Gregoricchio "al à scrit libris, poesii, tescj par cjançons, traduzioni e tescj radiofonics e al à vinçût par trê voltis il premi San Simon", il tierç ricevût tal 2006, cu la traduzion 'Il Var' di Ippolito Nievo, pôcs mès prime di murî.

Tra chês altris, stant che tal 2014 al è colât il setantesim de muart

di **Antoine de Saint-Exupéry**, autôr di "Le petit Prince", no si pues dismenteâ nancje "Il princip bambin", proget dai students dal cors par operadôr tai servizis sociâi dal an scolastic 2000-2001 de scuele Ipsia 'D'Aronco' di Glemone, publicât sul portâl video Dailymotion e dulà che Gregoricchio al veve coordenade la traduzion par furlan.

SEZION DEDICADE

In particolâr pal teatri, al à scrit lis 14 comediis par furlan che a saran publicadis sul sît de Agenzie regionâl pe lenghe furlane (www.arlef.it) dulà che la Arlef e previôt di istituî une sezion dedicate ae figure dal inteletuâl furlan.

Al inteletuâl, mancjât tal 2007, ancje in gracie dal impegn de Associazion teatrâl furlane, al sarà dedicât un spazi speciâl indulà che si podarà cjatâ 14 tescj. » DI **CHRISTIAN ROMANINI**

"Al è doverôs zontâ che chest proget al pues jessi realizât dome in gracie dal impegn de Associazion teatrâl furlane e di **Gianni Cianchi** che pe stesse al à curât un libri 'Gianni Gregoricchio. Teatro' dulà che al à metût dongje lis comediis di gno pari, che in part a son za publicadis de Atf" e specifiche simpri su Internet **Francesca Gregoricchio**.

"O vin aderît cun entusiasim ae propueste di Francesca - al spiegho **Lorenzo Fabbro** president de Arlef - parcè che o stimin che i 14 tescj pal teatri di Gianni a sein un patrimoni impuartant pe culture furlane".

TEATRI ROBE DI DUCJ

"Gno pari al sarès stât entusiast, o soi sigure - e siere Francesca Gregoricchio - propit parcè che al pensave che il teatri al fos une robe di ducj, e al è par ducj che Gianni al à scrit e lu à fat di inovadôr cun fidance inestinguibile pal public e te lenghe che al amave tant, il furlan".

Di fat, propit tai obietifs di chest proget al è chel di meti adun la siore produzion teatrâl, rindintle fruibile, di podè discjamâ e consultâ in maniere facile e gratuite, di bande di ducj i interessâts, prime di dut lis compagniis teatrâls che, ancjemò vuê, a metin in sene lis sôs comediis inconfondibilis.



ilfriuli@ilfriuli.it

SERADE SPECIÂL

Incuintri a Tavagnà cun Enzo Driussi

L'assessorât ae Culture dal Comun di Tavagnà, dentri de suaze de ativitât culturâl in lenghe furlane, al à inmaneât une serade di presentazion de ativitât leterarie di **Enzo Driussi**.

Vinars ai 6 di Març, aes 6 di sere, li dal Centri civic di Tavagnà in vie de Madonute (parsore de farmacie comunâl), si tignarà l'incuintri "Marum e Morbin - contis, pinsîrs e poesii": par cognossi, fevelâ e dibati cul autôr su la sô ativitât e produzion leterarie.

Di fat a son sù par jù 40 agns di presince tal panorame leterari furlan che lu àn puartât a plui di 20 publicazions. Fondadôr e president in cjarie dal Comitât Furlan pe Difese des Ostariis al à vint plui premis leteraris e cualchi edizion dal Festival de cjançon furlane. A. Tal intindiment dal autôr, une copie di ognidune des sôs publicazions a laran a insiorâ il patrimoni de Biblioteche Comunâl di Tavagnà. La serade, fate in colaborazion cu la Pro Loco di Tavagnà, e je vierte a ducj.

SCOLTADIS DI DRIUS

Murî di sîor

Par pajati une buine pension su le vite tu riscjîs di vivi puar. Ma tu varàs le sodisfazion di murî sîor.





SMS: 393 00 90700
 diretta@radiofantasy.it
 TEL. +39 0431 30022

la radio tra la gente

www.radiofantasy.it	UDINE VENETO ORIENTALE	FM 90.700	GORIZIA
	PORDENONE	FM 95.800	TRIESTE
			FM 89.100
			FM 89.100
			PAULARO
			TOLMEZZO
			FM 107.700
			FM 101.600